

आकाशवाणी

खबरां ----

1. प्रधानमंत्री नरेंद्र मोदी होरें भारत दे रक्षा खेत्तर च उल्लेखनीय परिवर्तन, आधुनिकीकरण ते आत्मनिर्भरता बक्खी ध्यान केंद्रित करने ताई सराहना कीती।
2. विदेश मंत्री डॉ. एस. जयशंकर होरें बन्ने पारा आतंकवाद दे मुद्दे पर पाकिस्तान गी चेतावनी दिंदे होई आखेआ जेकर आतंकवाद राएं उकसाया जाग तां भारत पाकिस्तान च अंदर बड़ियै हमला करोग।
3. कांग्रेस सांसद शशि थरूर हुंदे नेतृत्व च अखीरी संसदीय प्रतिनिधिमंडल 5 देशें दी अपनी सफल जात्तरा पूरी करियै भारत वापस परती आया ऐ।
4. केंद्री शिक्षा मंत्री धर्मेन्द्र प्रधान होरें विज्ञान गी विकसित भारत ते मानव केंद्रित विकास दे दृष्टिकोण उपर बल दित्ता।
5. उत्तर पच्छिम भारत च गर्म हवा आहले हालात, कई थाहरें तापमान 44 डिग्री थमां पार, भारतीय मौसम विभाग नै ओरेंज अलर्ट जारी कीता ते लोकें गी अपना ध्यान रखने ते जागरूक रोहने लेई आखेआ।

<><><><><><>

PM-Defence

प्रधानमंत्री नरेंद्र मोदी होरें पिछले 11 बरें च भारत दे रक्षा खेत्तर च होए दे उल्लेखनीय बदलाव पर लौ पाई। इक सोशल मीडिया पोस्ट च प्रधानमंत्री होरें आखेआ जे रक्षा उत्पादन च आधुनिक ते आत्मनिर्भरता हासल करने पर ध्यान केंद्रित कीता गेआ ऐ। उनें आखेआ जे एहू दिक्खना उत्साहजनक ऐ की कियों भारत दे लोक राष्ट्र गी मजबूत करने दे सांझा संकल्प कन्नै इकजुट होए न।

<><><><><><>

## PM-Article

प्रधानमंत्री नरेंद्र मोदी होरें आखेआ ऐ जे नौजवानें गी ध्यानै च रक्खियै भारत दे खेड्ड बुनियादी ढांचे दा विस्तार देश गी वैश्विक खेड्ड महाशक्ति बनने दी बक्खी अगड़ा बदा'रदा ऐ। केंद्री युवा मामले ते खेड्ड मंत्री डॉ. मनसुख मांडविया हुंदा इक लेख सांझा करदे होई प्रधानमंत्री होरें पिछले 11 बरें दे देश दे खेड्ड बुनियादी ढांचे दे अभूतपूर्व विकास पर लो पाई। लेख च केंद्री युवा मामले ते खेड्ड मंत्री मनसुख मांडविया होरें आखेआ जे पिछले इक दहाके च युवा मामले ते खेड्ड मंत्रालय दा बजट त्रै गुणा शा मता होई गेआ ऐ। मंत्री होरें आखेआ जे भविष्य दी बक्खी दिखदे होई भारत 2030 राष्ट्रमंडल खेड्डें ते 2036 ओलंपिक खेड्डें दी मेजबानी लेई संभावित बोली दी तैयारी करा रदा ऐ।

<><><><><><>

## Eve. Jaishankar

विदेश मंत्री डॉ. एस. जयशंकर होरें बन्ने पारा आतंकवाद दे मुद्दे पर पाकिस्तान गी चेतावनी दिंदे होई आखेआ जे जेकर आतंकवाद राएं उक्साया जाग तां भारत पाकिस्तान च अंदर बड़ियै हमला करोग। उनें आखेआ जे हाल च गै पहलगाम हमले जनेई बर्बर घटना दी स्थिति च आतंकवादी संगठनें ते उन्दे नेतृत्व दे खलाफ जवाबी कार्रवाई कीती जाग। मंत्री होरें इक अमरीकी राजनीतिक समाचार पत्र गी दिक्ते गेदे साक्षात्कार च एहू गल्ल आक्खी।

<><><><><><>

## EAM-China

विदेश मंत्री डॉ. एस जयशंकर होरें आखेआ जे चीन पाकिस्तान कन्नै अपनी दोस्ती नभाने लेई आतंकवाद खलाफ दोहरे मापदंड नेई अपनाई सकदा। उनें आखेआ जे आतंकवाद इक नेई समस्या ऐ जेड़ी सबबनें गी चैंता च पाई दिंदी ऐ। अपनी फ्रांस दी जात्तरा दुरान इक फ्रांसिसी अखबार कन्नै इक साक्षात्कार च डॉ. जयशंकर होरें आखेआ जे भारत ते चीन अपने रिश्ते गी लगातार सुधारी सकदे न ते

कोविड महामारी दे बाद थमां निलंबित कीते गेदे प्रत्यक्ष डुआरें गी फी शुरू करने पर विचार करी सकदा ऐ। जयशंकर होरें संयुक्त राष्ट्र सुरक्षा परिषद च इक स्थाई सीट लेई भारत दी बचनबद्धता गी दोहराया। उनें आखेआ जे भारत इक बड़ी भूमिका नभाने लेई तैयार ऐ।

<><><><><><>

### All Party Delegation

कांग्रेस सांसद शशि थरूर हुंदे नेतृत्व च अखीरी संसदीय प्रतिनिधिमंडल 5 देशें दी अपनी सफल जात्तरा पूरी करियै अज्ज भारत परती आया ऐ। प्रतिनिधिमंडल नै सब्बै रूपें ते अभिव्यक्तियें च आतंकवाद दा मकाबला करने लेई भारत दी राष्ट्री सहमति ते दृढ दृष्टिकोण गी प्रदर्शित करने लेई अमरीका, पनामा, ब्राजील गुआना ते कोलंबिया दा दौरा कीता हा। नमीं दिल्ली च मीडिया कन्नै गल्ल करदे होई श्री थरूर होरें आखेआ जे दौरे दौरान प्रतिनिधिमंडल नै कई बैठकां कीतियां जिस च उनेंगी इस मुद्दे ताई सकारात्मक प्रतिक्रियां थोइयां।

<><><><><><>

### Rajnath-Defence

रक्षा मंत्री राजनाथ सिंह होरें आखेआ जे भारत दे रक्षा खेत्तर च पिछले 11 बरें च प्रधानमंत्री नरेंद्र मोदी हुंदे नेतृत्व च ऐतिहासिक बदलाव होआ ऐ। इक सोशल मीडिया पोस्ट च श्री सिंह होरें आखेआ जे प्रधानमंत्री हुंदे नेतृत्व च मजबूत बनने, आधुनिक सशस्त्र बल, स्वदेशी थेआर, रिकार्ड रक्षा निर्यात ते वैश्विक विश्वास कन्नै एहू खेत्तर आत्मनिर्भरता दी बक्खी अगगे बदा रदी ऐ।

<><><><><><>

### Edu. Minister

शिक्षा मंत्री धर्मेन्द्र प्रधान होरें आखेआ ऐ जे वैज्ञानिकें, नमियां काडुं कडुने आहले ते नीति निर्माताएं

लेई समावेशी परिस्थितिकी तंत्र ते समाधान बनाने लेई इक्के मंच पर औने दा एहू सब्बनें शा उपयुक्त समें ऐ जेड़ा सब्बनें शा कमजोर लोकें गी सशक्त बनांदा ऐ। हैदराबाद च युवा वैज्ञानिकें दे अंतरराष्ट्री सम्मेलन ते ग्लोबल यंग अकादमी दी वार्षिक आम बैठक गी संबोधित करदे होई मंत्री होरें वैज्ञानिकें थमां उद्देश्य ते सहानुभूति दी भावना कन्नै सहयोग करने ते सह निर्माण करने दा आह्वान कीता।

<><><><><><>

### Nityanand-NSG

गृह राज्यमंत्री नित्यानंद राय होरें आखेआ ऐ जे भारत कुसा बी चाल्ली दे आतंकवादी गतिविधियें गी बर्दाश्त नेई करोग ते आतंकवाद दा मुकाबला करने लेई ठोस गैं पुट्टदा रौहगा। श्री राय होरें आखेआ जे पहलगाम आतंकवादी हमले दे बाद देश नै आपरेशन सिंदूर तैहत पाकिस्तान गी बनकदा परता दित्ता ऐ। श्री राय होर अज्ज नमीं दिल्ली च राष्ट्री सुरक्षा गार्ड दे 23में अंतरराष्ट्री सेमीनार दा उद्घाटन करा'रदे हे।

<><><><><><>

### Jan Man Survey

नरेंद्र मोदी सरकार दे 11 बरे पूरे होने दे मौके पर नरेंद्र मोदी ऐप या नमो ऐप पर शुरू कीते गेदे जन-मन सर्वेक्षण नै इक गै दिन च देश भरै दे नागरिकें थमां 5 लक्ख शा मतियां प्रतिक्रियाएं कन्नै महत्वपूर्ण गति हासिल कीती ऐ। कल प्रधानमंत्री नरेंद्र मोदी होरें सब्बनें गी पिछले 11 बरें च भारत दी विकास जात्तरा पर नमो ऐप पर सर्वेक्षण च शामिल होने दी गुजारश कीती ही। जन मन सर्वेक्षण लोकें गी सरकार कन्नै अपनी प्रतिक्रिया ते राय सिद्धे सांझा करने लेई इक मंच प्रदान करदा ऐ।

<><><><><><>

### Special-Feature 11 years

भारत नै पिछले दहाके च महत्वपूर्ण बदलाव दा अनुभव कीता ऐ जेड़ा सेवा, सुशासन ते गरीब कल्याण दे सिद्धांतें थमां प्रेरित ऐ। आकाशवाणी समाचार पिछले 11एं बरें च प्रमुख खेत्तरें च सरकार

दे जत्तें उप्पर इक बिशेश प्रसारणलेइयै आवा'रदा ऐ। इस्सै श्रृंखला च अज्ज पेश ऐ देश दी फ्हाजत च आत्मनिर्भरता ते भारत गी इक वैश्विक शक्ति बनाना। पिछले दहाके दौरान भारत नै अपनी सुरक्षा रणनीति गी स्पष्ट, मजबूत ते आत्मविश्वास कन्नै नमां रूप दित्ता ऐ। 2016 दी सर्जिकल स्ट्राइक कोला लेइयै 2025 च आपरेशन सिंदूर तगर एहू स्नेहा साफ ऐ जे भारत अपनी राश्ट्री सुरक्षा आस्ते कुसै बी धमकी गी मंजूर नेई करोग। ब्हाई ज्हाज पोत आई.एन. एस विक्रांत ते मती उच्ची उंचाई पर डोआरी भरने आहले हौले लड़ाकू हेलीकाप्टर एल.सी.एच प्रचंड जनेही संपत्तियें दे कन्नै भारत आत्मविश्वास कन्नै डिजाइन ते तैनाती दे कोल पुज्जा दा ऐ। रक्षा उत्कृष्टता आस्ते नवाचार, आईडेक्स जनेह कार्यक्रम स्टार्ट अप्स ते भलेआं लौहके, लौहके ते दरम्याने उद्यमें गी स्थाढी फौजें आस्तै उन्नत समाधान प्रदान करने च समर्थ करा'रदे न। अगेत्री चौकियें शा लेइयै निर्माण तगर युद्ध दे मैदानै शा लेइयै कारोबारी बैठकें तगर भारत इक नमें युग दी शुरूआत करा'रदा ऐ जित्थे सुरक्षा स्थाढी इक ताकत ऐ ते आत्मनिर्भरता स्थाढा इक कवच।

<><><><><><>

## IMD

भारती मौसम विभाग नै दिल्ली दे कई हिस्सैं, हरियाणा, चंडीगढ़, जम्मू-कश्मीर, पंजाब, राजस्थान ते उत्तर प्रदेश च गर्म हवा आहले हालात दी मेद बुज्झी ऐ। मौसम एजेंसी नै अगले 2 दिनें लेई ओरेंज अलर्ट जारी कीता ऐ ते लोकें गी चला'रदे गर्मी आहले हालात थमां अपने आपै गी बचाने ते सुरक्षित रौहने लेई आखेआ ऐ। जम्मू-कश्मीर च जम्मू खित्ते च गर्म हवा आहले हालात बने देन। साम्बा जिले दा बद्दोबद्द तापमान 46 अशारिया 6 डिग्री सेल्यिस रिकार्ड कीता गेआ जिस्सले जे कल जम्मू शहर च 44 अशारिया 3 डिग्री सेल्यिस रिकार्ड कीता गेआ। श्रीनगर च 33 अशारिया 3 डिग्री तापमान रिकार्ड कीता गेआ।

<><><><><><>

## Goyal-Switzerland

बंज बपार ते उद्योग मंत्री पीयूष गोयल होरें स्विटजरलैंड जात्तरा दौरान भारत-EFTA बपार ते आर्थिक भागीदारी समझौते पर गल्लबात च हिस्सा लैता। सोशल मीडिया पर इक पोस्ट च श्री गोयल होरें आखेआ जे उनें इस समझौते राएं भारत ते स्विटजरलैंड बश्कार बपार ते निवेश दे मौके, भागीदारी ते उभरदे आयामें दी संभावनाएं पर विचार विमर्श कीता। एहदे कोला पैहले श्री गोयल होरें आखेआ जे भारत ते 4 देशें दे यूरोपीय Blog- EFTA बश्कार मुफ्त बपार समझौता सितंबर च लागू होने दी मेद ऐ। उनें आखेआ जे भारत अज्ज निवेश लेई सर्वाधिक पसंदीदा थाहर ऐ।

<><><><><><>

## Russia-Ukraine Attack

कवि ते ओडेसा च 300 शा मते रूसी ड्रोन ते मिसाइले दे हमले च घट्टोघट्ट 2 लोकें दी मौत होई गई ऐ ते 13 होनें जख्मी होई गेन। यूक्रेन दे राष्ट्रपति व्लादिमीर जेलेन्स्की होरें आखेआ जे रूस नै सारी रात यूक्रेन पर 315 ड्रोन ते 7 मिसाइलां दागियां। यूक्रेन दी वायु सेना नै दस्सेआ जे 284 ड्रोन ते सब्बे 7 मिसाइलें गी रोक़ी दित्ता गेआ। खेत्तरीय गवर्नर ओलेह किपर होरें आखेआ जे ओडेसा दे केंद्र च आवासीय इमारतां नष्ट होई गेइयां या क्षतिग्रस्त होई गई ऐ। एहू संघर्ष दी शुरूआत दे बाद थमां रूस आसेआ कीते गेदे सब्बनें शा बड्डे ब्हाई हमले चा इक हा।

<><><><><><>

## BSF-VDG

बी.एस.एफ दे जम्मू सेक्टर दे डी.आई.जी सुखमिंदर सिंह होरें आखेआ ऐ जे बलें आसेआ इक नमें जत्त तैहत ग्राम रक्षा गार्ड दे मिम्बरें गी सिखलाई दित्ती जा'रदी ऐ। साम्बा जिले दे रामगढ़ सेक्टर आहले अंतरराष्ट्री बन्ने कन्नै लगदे इलाकें दे वीडीजी गी सिखलाई दित्ती जा रदी ऐ। 30 युवाएं गी हथियारें

सरबंधी ते बन्ने पर गश्त दौरान निगरानी बारै सिखलाई दिती गई। एहदा मकसद सुरक्षा सरिस्ते गी मजबूत करना, निगरानी बेहतर बनाना ते लोकें दी शमूलियत गी यकीनी करना ऐ।

<><><><><><>

### SIA-Raids

प्रदेश जांच एजेंसी जम्मू आसेआ पुंछ दे सुंजवां थाहर रिहायशी घरै च छापेमारी कीती गई। एहू छापेमारी नशीले पदार्थें दी तस्करी कन्नै जुड़े दे आतंकवाद आहले मामले च कीती गई। मोहम्मद जमील उर्फ आकाश ते मामिर सोहेल दे घरें च कीती गई। स्हाड़े जिला संवाददाता नै जानकारी दिती ऐ जे एहू मामला आतंकवादी संगठनें गी रपेआ पैहा पजाने आहले मामले कन्नै जुड़े दा ऐ। एहू लोक कथित तौर पर पाकिस्तान थवां होने आहले नशीले पदार्थें दी तस्करी कन्नै जुड़े दे हे।

<><><><><><>